



Sud Bosne i Hercegovine
Суд Босне и Херцеговине

Broj: S1 3 Iž 048609 24 Iž
Sarajevo, 17.07.2024. godine

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović kao predsjednika vijeća, Dinke Bešlagić-Čovrk i Mirsade Džindo, kao članova vijeća, odlučujući o žalbi, Pozder Mersiha, iz ..., izjavljenoj protiv Rješenja Centralne izborne komisije Bosne i Hercegovine broj: 06-1-07-1-674/24 od 09.07.2024. godine, o davanju saglasnosti na Odluku Općinskog vijeća Trnovo kojom se imenuje član Općinske izborne komisije Trnovo, u nejavnoj sjednici, održanoj dana 17.07.2024. godine, donio je

R J E Š E N J E

Žalba se odbija.

O b r a z l o ž e n j e

Žalitelj je podnio žalbu protiv rješenja Centralne izborne komisije Bosne i Hercegovine broj: 06-1-07-1-674/24 od 09.07.2024. godine kojim se daje saglasnost na Odluku Općinskog vijeća Trnovo (F BiH) broj: 01-02-2549/24 od 20.06.2024. godine, kojom se na dužnost člana Općinske izborne komisije Trnovo (F BiH) imenuje Kenan Hromo, član.

Podnositelj žalbe navodi da su na javni oglas za imenovanje OIK Trnovo objavljen dana 15.04.2024. godine na koji se prijavio u dalju procedure prošla dva kandidata. Međutim, nije dobio niti jedan dokument koji se odnosi na bodovanje i način bodovanja. Naglašava da je prisustvao svim izbornim ciklusima od 2000-te, da je bio posmatrač ispred CCI-a, ili kao član biračkog odbora, a 2015. godine je bio imenovan kao član OIK Trnovo (F BiH). Tokom izbornog ciklusa prisustvovao je obukama u organizaciji Centralne izborne komisije BiH i posjeduje certificate za trening biračkih odbora i kontrolu izbornih rezultata. Uz žalbu dostavlja Certifikat "Trening trenera" iz 2021. Godine i 2022. Godine, te uvjerenje Centralne izborne komisije BiH za učešće na Konferenciji.

U odgovoru na žalbu Centralna izborna komisija BiH je predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo sljedeće:

Žalba nije osnovana.

Iz stanja spisa proizilazi da je Opštinsko vijeće Trnovo aktom, broj: 02/06-04-2570/24 od 20.06.2024. godine zatražilo od Centralne izborne komisije BiH saglasnost na odluku, broj: 01-02-2549/24 od 20.06.2024. godine, kojom se na dužnost člana Općinske izborne komisije Trnovo (F BiH) imenuje Kenan Hromo, član.

Na sjednici održanoj dana 09.07.2024. godine, Centralna izborna komisija BiH je donijela Rješenje broj: 06-1-07-1-674/24 od 09.07.2024. godine, kojim je dala saglasnost na Odluku Općinskog vijeća Trnovo broj: 01-02-2549/24 od 20.06.2024. godine, kojim se na dužnost u članstvu Opštinske izborne komisije Trnovo (F BiH) imenuje Kenan Hromo.

Centralna izborna komisija Bosne i Hercegovine je, razmatrajući dokumentaciju koju je dostavilo Opštinsko vijeće Trnovo (F BiH), utvrdila da imenovani član Opštinske izborne komisije Trnovo (F BiH) ispunjavaju sve uslove propisane Izbornim zakonom Bosne i Hercegovine i Uputstvom o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini ("Službeni glasnik BiH", br. 67/21, 73/21, 1/22 i 13/22, 78/23 i 31/24) (u daljem tekstu: Uputstvo).

Cijeneći navode podnosioca žalbe „da tokom procesa imenovanja, nije dobio niti jedan dokument koji se odnosi na bodovanje i način bodovanja, zatim da je prisustvovao svim izbornim ciklusima od 2000-te i da je prisustvovao obukama“, „što je dostavio u prilogu žalbe“ valja istaći da su isti paušalni.

Naime, uvidom u zapisnik 3 Konkursne komisije bodovanje kandidata je vršeno po osnovu: stručne spreme, naučnog zvanja, izbornog iskustva i uspjeha postignutog na intervjuu. Iz zapisnika proizilazi da je konkursna komisija podnosioca žalbe bodovala po osnovu izbornog iskustva sa ukupno 3 boda, kako je i propisano Uputstvom, imajući u vidu da je imenovani bio član izborne komisije Trnovo. Na osnovu izvršenog bodovanja po navedenim kriterijima sačinjena je rang lista uspješnih kandidata, gdje je prvorangirani kandidat Kenan Hromo osvojio ukupno 10,66 bodova, a podnosilac žalbe ukupno 10,33 boda. Kako nema obaveze konkursne komisije da dostavlja utvrđenu rang listu kandidatima, kao ni da ih obavještava o bodovima, to je ista pravilno postupila kada je rang listu dostavila Opštinskom vijeću Trnovo, kao nadležnom organu, u skladu sa odredbom člana 10. stav (10) navedenog Uputstva.

Stavom (10) istog člana propisano je da konkursna komisija sačinjava rang listu sa redoslijedom kandidata prema uspjehu, dok je u stavu (11) propisano da nadležni organ, cijeneći položaj kandidata na listi donosi odluku o imenovanju Članova izborne komisije.

To znači da je Opštinsko vijeće Trnovo, cijeneći položaj kandidata na rang-listi, donijelo Odluku o imenovanju jednog člana Opštinske izborne komisije Trnovo (F BiH), a da su naprijed citirani navodi podnosioca žalbe samo paušalni.

Imajući u vidu odredbu člana 13. stav (2) Uputstva kojom je propisano da

Centralna izborna komisija Bosne i Hercegovine daje pisanu saglasnost na odluku o imenovanju članova izborne komisije, ukoliko su ispoštovane procedure iz člana 7. , 8., 9., 10. i 13. stav (1) ovog Uputstva i ukoliko izabrani kandidat ispunjavaju propisane uslove, to je Centralna izborna komisija pravilnom primjenom odredbe člana 2.9 stav (1) tačka 17. I člana 2.12 stav (5) Izbornog zakona Bosne I Hercegovine i navedenog člana Uputstva Bosne i Hercegovine donijela pravilno i zakonito rješenje.

Obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**Predsjednik vijeća
Sudija**

Vesna Trifunović